



攝正法行

廣明攝正法行

人大

法大

請說

世尊！我今承佛威神更說大義。

許說

佛言：便說。

總示

勝鬘白佛：攝受正法攝受正法者，無異攝受正法，無異攝受正法者；攝受正法善男子善女人，即是攝受正法。

正說

別說

自捨三事以攝受正法

明捨行

何以故？若攝受正法善男子善女人，為攝受正法，捨三種分，何等為三？謂身，命，財。

明常德

善男子善女人捨身者，生死後際等，離老病死，得不壞常住無有變易不可思議功德如來法身。

捨命者，生死後際等，畢竟離死，得無邊常住不可思議功德，通達一切甚深佛法。

捨財者，生死後際等，得不共一切眾生無盡無減畢竟常住不可思議具足功德；得一切眾生殊勝供養。

讚行人

世尊！如是捨三分善男子善女人攝受正法，常為一切諸佛所記，一切眾生之所瞻仰。

化他諍訟以護持正法

明護法行

世尊！又善男子善女人攝受正法者，法欲滅時，比丘、比丘尼，優婆塞、優婆夷，朋黨諍訟，破壞離散，以不諂曲，不欺誑，不幻偽，愛樂正法，攝受正法，入法明中。

讚歎行人

入法明者，必為諸佛之所授記。

證說

如來讚成

勝鬘推佛

世尊！我見攝受正法如是大利，佛為實眼實智，為法根本，為通達法，為正法依，亦悉知見。

隨喜

爾時，世尊於勝鬘所說攝受正法大精進力，起隨喜心。

讚歎

如是勝鬘！如汝所說攝受正法大精進力，

如大力士，少觸身分，生大苦痛。如是勝鬘，少攝受正法，令魔苦惱；我不見餘一善法令魔憂苦，如少攝受正法。

又如牛王，形色無比，勝一切牛。如是大乘少攝受正法，勝於一切二乘善根，以廣大故。

又如須彌山王，端嚴殊特，勝於眾山，如是大乘捨身命財，以攝取心攝受正法，勝不捨身命財初住大乘一切善根，何況二乘？以廣大故。

勸學

是故勝鬘，當以攝受正法開示眾生，教化眾生，建立眾生。如是勝鬘，攝受正法如是大利，如是大福，如是大果。

勝鬘！我於阿僧祇劫，說攝受正法功德義利，不得邊際，是故攝受正法，有無量無邊功德。